


明朝典彙



			九	漢
		一	〇	書
六	一	〇	五	門
四	三	四	號	類
冊	架	函		

庫文閣內			
元	九		漢
四	〇		書
函	六		
二	四	五	
三	架	冊	號
			類

內閣文庫	
番號	漢 9205
冊數	64 (41)
函號	294 39

四十一



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM. Kodak



國朝典彙卷一百十四

都察院右僉都御史 臣徐學聚 編輯

禮部十二

淺草文庫

災異附殿災 日月食

吳元年正月絳州天鼓鳴

三月蒙古大都大風晝晦

方明

十月福州地震 太白歲星熒惑聚斗

國朝典彙卷一百十四

災異

一

上謂侍臣曰吾自起兵以來凡有所爲意向所萌天必垂象示之其兆先見故常加儆省不敢逸豫侍臣曰天高在上其監在下故能修省者蒙福不能受禍上曰天垂象所以警乎下人君能體天之道謹而無失亦有變災而爲祥者故宋公一言熒惑移次齊侯暴露甘雨應期災祥之來雖曰在天實由人致也

洪武元年正月庚寅彗星見於昴畢

三月彗星出昴北按昴胡星也彗除舊布新之象也唐李淳風作晉天文志成帝咸和七年十一月熒惑守昴八年七月熒惑入昴占曰胡王是月石勒果死九年

八月月又犯昴十一月石虎廢石弘幽殺之淳風曰是時雖二石僭號而其疆弱常占於昴不關太微紫宮也自是精於天文者首稱淳風而其言如此則昴爲胡星明矣又言強弱不關於太微紫宮則胡人雖入中國僭大號不得當正統又明矣嗚呼天人之際淵乎微哉迨我聖祖以正月卽皇帝位復中國之正統彗星卽見於昴畢之間是月又出於昴北至七月而元遂亾除腥羶之舊穢布文明之新化以開千萬年大平之瑞天也七月蒙古大都紅霧又黑氣起壬戌白虹貫日乙丑白虹復貫日

八月 上謂中書省臣曰近京師火四方水旱相仍朕夙夜不遑寧處豈刑罰失中武事未息徭役屢興賦歛不時以致陰陽乖戾而然耶朕與卿等同國休戚宜輔朕修省以消天譴叅政傅瓛等對曰古人有言天心仁愛人君則必出災異以譴告之使知懼自省人君遇災而不能驚懼則天變可弭今陛下修德省愆憂形於色居高聽卑天實鑒之顧臣等待罪宰輔有乖調燮貽憂聖衷咎在臣等 上曰君臣一體苟知驚懼天心可回卿等其盡心力以匡朕不逮於是詔中書省及臺部集者儒講議便民事宜可消天變者

二年六月彰德李實如黃瓜

先是有童謠云李生黃瓜民皆無家

三年十二月壬午日中有黑子 詔廷臣言得失起居注萬謚言日者陽之精也至陽之中而有黑子是陰之奸乎陽也其在人事德為陽刑為陰君子為陽小人為陰刑勝乎德小人勝乎君子臣請凡臣民有罪法當死者皆三覆奏毋輒置之刑小人而奸君子之位者黜之庶乎天象感也吏部尚書郎本中言日者君象也在陛下修德以禳之君德修則天變自消昔宋景公一言之善災或猶為退舍况陛下以天錫之資誠能益加修省何天變之不回哉且河南中原之士隱於山林者宜訪求

之仕於朝者有能加其官或不能者加其黜罰焉天之
仁愛人君鑒視告戒無所不在則人君體之於心而施
之於政者亦當無所不用其情也詩曰明明在上赫赫
在下天人感應之機如此願陛下無忽 上皆嘉納
四年十月 上謂中書省臣曰祥瑞災異皆上天垂象然
人之常情聞禎祥則有驕心聞災異則有懼心朕常命
天下勿奏祥瑞若災異即時報聞尚慮臣庶罔體朕心
遇災異匿而不舉或舉而不實使朕失致謹天戒之意
中書其行天下遇有災變卽以實上聞

五年黃河竭可涉

七月十七日建康地震大雷震死男女十六人驢一

八月乙酉餘溝縣西北空中有聲如雷

六年正月甲申朔申刻有火自中天西墜化白氣復曲折
上騰聲如雷踰時西方復有大星赤色自中天西行近
灣尾跡化白氣曲曲如蛇形久之如雷震地詔寬恤天
下舊年糧米及坐派物料未徵者盡行蠲免已徵者糶
未就畱本處賑濟物料准作次年之數不許朦朧再徵

四月彗星三入紫微垣

七年十二月太陰犯軒轅左角 上諭中書省臣曰太陰
犯軒轅占云大臣黜免爾中書宜告各省衛官凡公

有乖政體者宜速改以求自安

八年四月甲寅日上有青氣在趙分恒山之北北夷遼東之地 上遣使往北邊諭潁川侯傅友德并定遠等處都指揮司詰戎練兵嚴飭守備

八月京師大旱

是年庫錢庫銀飛或曰此陰盛陽微之徵也時錢銀貯久一日南臺民家屋皆有錢豎立瓦上各以竹穿其孔貫之或得一二十文始知皆庫錢也又廣積庫內鎮庫銀其重數百斤忽穿庫飛出一儒生夜坐見田間火起曰此必有寶因往識其地比旦乃在秧田中去土尺許見

白銀有珠填廣積字大不可舉遂告相識者十八人同掘取已而分爭不平遂聞於官 上曰此銀已失三塊矣此天所以畀是儒也其賜之餘止與傭工錢

九年三月壬申太白晝見

六月戊子客星見至七月乙亥沒

九月 上遣吳英往北平諭徐達曰七月火星犯上將此月金星又犯之占有奸人刺客當謹備之可編諭諸將一體嚴密雖左右將校勿令相近其故元閣官尤宜防範惟南去者可以使命

閏九月以五星紊度日月相刑詔求直言

詳求言

十年正月丁酉夜雨黑水如墨汁池水皆黑浙江金處諸境皆有之按占云黑靄霧下天下冤次年按察司經歷王尚賢分守金處酷刑擾害死徙者五百家是其應也
二月白虹貫日

十月初三日虎白日入漢西門傷二軍人其一死詔赦在京徒殺

十一年元旦蚤朝文武已集鳴鼓數扣忽斷爲二上怒甚欲罪工部官得胡丞相奏始免及朝有鷓鴣自天而墮死於丹墀見者異之又瑞昌縣奏有大聲如鐘自天而下無形蓋妖鼓也次年官民皆災

八月蘇松揚台等處海溢 九月客星掃天弁

十月有星孛於天

十二年四月遣使勅曹國公李文忠西平侯沐英等曰四月庚申日交暈在秦分主有戰鬪己未太白見東方至於甲子順行而西西征大利爾等宜順天時追擊番寇
十四年五月丁未建德雪六月己卯杭州晴日飛雪

十一月黑氣亘天

十五年勅征南將軍傅友德等曰九月乙丑夜熒惑犯南斗蓋上天垂象以示鑒戒自昔蠻夷叛服不常卿等率師久勞於外恐衆心懈弛爲寇所乘宜嚴加戒飭以備

不虞且蠻夷好置毒水將士飲食極宜謹慎以副朕懷

十六年正月戊申白虹貫日

十八年二月己巳初昏五星並見

九月戊寅太白經天客星入太微垣 乙酉彗長丈掃箕

十月彗掃天廟

十九年三月白虹貫日 四月熒惑入南斗 七月癸亥

三辰晝見

二十年二月五星皆見 五月丁巳三辰晝見 六月太

白經天

二十一年十二月丁卯三辰晝見

二十二年十二月白虹貫日

二十三年正月熒惑入南斗 七月江南北海溢

七月揚州海潮汎溢溺死竈丁三萬餘人松江海鹽亦各

二萬餘人

二十四年四月彗星三入紫微垣

二十六年四月太白經天京師大旱求直言錄囚徒

二十九年十二月五星彗度

三十年二月白虹貫日

五月庚申夜有星大如雞子尾跡有光自天厨入紫微垣

下有二星隨之至游氣中没 上觀天象占在北虜遂

勅晉代遼寧谷諸王曰驗之歷代天象若此者邊伐不
寧往往必驗今天象與往者正同不可不慎也
十月熒惑犯南斗

三十一年九月長星西隕有聲如雷

十月熒惑守心時岳池縣教諭程濟占應兵起北方期在
明年因上書於朝

建文元年三月京師地震御史尹昌隆上疏言奸人專政
陰盛陽微謫見於天執政大怒斥爲福寧知縣

永樂元年正月夜木星犯建星西第三星

四月太白出昴北 閏十一月北京山地震

二年十一月京師地震 諭文武羣臣宜戒謹修職共回

天意凡軍民有不便之事當速改之

六年七月 上御奉天門顧侍臣曰近日郡縣奏水旱朕
甚不寧通政馬麟對曰水旱出天數堯湯時不免今間
一二處有之不至大害 上曰爾此言不學故也洪範

恒雨恒暘皆本於人事不修顧尚書方賓等曰朕與卿
等皆當修省更須擇賢守令守令賢則下民安民安於
下則天應於上麟言豈識天人感應之理麟慚而退

八年正月辛卯夜有星大如盞青白色尾跡有光出文昌
西北行至近濁 甲午夜有星大如雞子青白色有光

出天厨西南行至雲中

二月丁未夜有星大如雞子青白色尾跡有光出右攝提南行至近濁 壬子有星大如雞子青白色有光出女床西北行至游氣

三月戊辰夜有星大如碗赤色光燭地出太微東垣外西南行入太微垣右執法星旁 乙酉夜有星大如盞赤色有光出漸臺東北行至近濁

四月庚子行在各營中夜刀戟皆有火光 夜有星大如雞子青白赤色尾跡有光出紫微垣內后星旁西北行至北斗魁 乙巳夜月犯靈臺上星 乙卯夜月犯十

二國之秦星

五月丁卯夜有星大如雞子青白色有光出東南雲中東北行至近濁

六月壬寅夜有星大如雞子赤色光燭地出輦道東北行入貫索內 丙午夜火星犯太微垣右執法

八月丙申夜有星大如盞青白色尾跡有光出西方西南行入游氣 甲子水星犯右執法

九月戊辰夜有星大如盞青白色光燭地出正南雲中西南行至近濁 乙亥夜木星犯靈臺土官 巳丑夜月犯太微西垣上將星

辛卯夜金星犯天江南二星

十月甲午朔夜有星大如碗赤色有尾跡光燭地出司怪

旁東北入輿鬼星 戊申晝太白見未位 壬子夜月

犯五諸侯二星 甲寅夜有星大如彈丸赤色尾跡有

光出天關流五丈餘光如雞子大西南行入天杼 戊

午夜月犯太微垣右執法 諭三法司宜加敬謹無罪

不可枉有罪不可縱須得中道無纖毫輕重

十二月壬子月犯木星

九年二月甲辰夜有星大如盞赤色有光出陣車流丈餘

發光近西濁北行至游氣 巳未夜有星大如碗青白

色出正南雲中西北行入雲中

四月庚子夜月犯木星 庚戌夜有星大如盞赤色有尾

光燭地出紫微垣內四輔旁北行至游氣

十年三月甲午夜月犯軒轅大星

六月癸亥夜月犯心宿後星 十月乙丑夜月掩犯昴宿

十四年六月丁卯夜太白犯諸王東第一星

陝西雨雹傷麥 沛縣淫雨傷稼 獲鹿縣雨雹傷稼

七月鄒縣淫雨暴水至壞民廬舍二百一十二戶 霑化

縣暴雨傷田禾 開封府十四州縣淫雨決黃河堤崖

沒居民田稼 乙巳夜太白犯鎮星 辛亥夜鎮星犯

鬼宿東南星

九月癸卯京師地震 丁未夜月犯畢宿

洪熙元年正月癸未以過冬不雪勅府部院大臣懋修乃
職康濟兆民惟誠可以動天願共勉之

乙未日生左右珥色赤黃白虹貫之

二月辛酉夜月犯天江

三月南京地震者三

四月南京地震星變 上問蹇義夏原吉楊榮楊士奇口

昨夜星變見否對曰未見 上慘然曰天命也歎息而

起明日召士奇義曰朕監國二十年讒慝交構心之艱

危三人共之賴 皇考仁明得保全言已泣下二人亦

流涕慰上 上曰卽吾不幸後誰知吾三人同心一誠

宣德元年八月京師地震 東南天鳴聲如萬鼓

四年正月南京地震

五年十月丙申夜蓬星見八日始滅

六年四月有星孛於東井 九月熒惑犯南斗

八年八月熒惑犯南斗

閏八月彗出天倉旁入貫索掃七台按鄭曉曰是月有怪

星見或曰歸邪星也

正統元年四月河北旱蝗 九月白虹貫日修狼星動搖

冬旱無雪先是鄭時論梁芳被謫陝西人皆哭送傳聞至京上知之頗厭芳所爲至是無雪百禱不應科道復交章論芳乃命中宮袁琦傳旨今後內官傳奉除官不問有無勅書俱覆奏明白方行卽日召吏部降四人黜九人下六人於獄皆迯自軍囚者餘尚未斥而人已稱快厥明大雪

三年五月江北大水

四年六月京師大水詔求直言修廢政令戶部侍郎吳璽順天府尹姜濤賑卹軍民

勅諭公侯伯五府六部都察院等衙門因災修政除革弊

事件二十一條皆閣臣楊士奇代草一吏部考黜貪污無能官吏裁革冗員一在外官員未及兩考者不許保舉一差人踏看水旱災傷具聞開豁一拖欠各項錢糧物料悉蠲免一考察貪虐軍官勿令管事一各處解納段疋顏料等項不許刁蹬畱難一稱賀祥瑞禮部行文止之一做工人匠勿令失所一推問囚犯不許拷打逼認一言官務扶善惡不許肆爲欺蔽餘俱切弊政

九年閏七月浙西大水

十四年七月癸亥入南斗侍講徐理頗知天文私語友劉溥以不祥久之不退舍皆曰禍不遠矣亟命妻孥南歸

皆重遷有難色珵怒曰爾不急去待作達子婦耶乃行

珵字有貞

是年二至夏晝冬夜各六十一刻

時王振擅權災異疊見振諱言之紹興山移於平地民告於官不敢聞又地動白毛徧生奏之如常又陝西二處山崩壓沒人家數十戶一處山移有聲叫三日移數里不敢詳奏又黃河改往東流於海滄沒人家千餘戶振略不警畏狠恣愈甚禍及國家可畏哉

景泰元年正月彗星出天市垣掃天紀

閏正月京師烈風晝晦彗星見

六月少保于謙言南京災異迭見乞敬天仁民法祖公賞罰戒遊畋却玩好 上曰災異迭見皆朕之過覽卿所言足見愛君愛國之心朕當益加警省庶回天意但有見聞尤須進言以匡朕德以盡卿職

三年三月有星孛於畢 八月熒惑晝見

十月癸未客星見輿鬼

四年五月乙丑有星出勾陳比二小星隨之

丁丑歲星晝見 六月甲辰又見

五年正月積雪恒陰 詔求直言

天順元年六月彗孛連見

巳亥是日清霽酉刻大風雷雨驟從西北來發樹壞屋須
臾雨雹大如雞彈至地經時不化奉天門東吻牌摧毀
欽天監奏雹者陰勝陽也盛陽雨水氣熱而陰勝之則
轉爲雹占書曰凡雨雹所起必有愁怨不平之事伏乞
皇上謹天戒修省寬恤刑獄 上然之

二年欽天監湯序奏災異請盡去奸臣 上問閣臣岳正
對曰奸臣無主名卽求之人人自危且序術疎淺不足
信事遂止

三年十月彗出星變日暈數重累月不息

四年六月 上以京師大水壞屋溺人命工部侍郎邵昱
倉都御史曹翼同給事中擇京城內外高爽之地及各
廩房以居官吏軍民之無屋者戶部侍郎吳璽順天府
尹姜濟存問被水之家給米一石溺死者皆五百貫
五年五月江南北大水連年水災天下米價皆貴人民艱
難至是年尤甚

七月巡按河南御史陳璧等奏久雨河溢水入汴梁城官
舍民居漂沒過半公帑私積蕩然一空周府宮眷并臣
等各乘舟筏避於城外高處軍民死者甚衆 上命工
部侍郎薛遠往視之

七年二月晦夜空中有聲大學士李賢上疏曰傳言無形

有聲謂之鼓妖上不恤民則有此異惟陛下憫念元元
凡一切不便於民者悉皆停罷則災變可弭 上命賢
具寬恤事宜以進皆從之

八年五月五日大風雹飄瓦拔木壞郊壇降勅修省

成化元年正月巳酉朔夜有流星光燭地自左攝提東南
行至天市西垣

二月彗星見 天雨黑黍於襄陽地震屋宇搖動有聲

三月彗星見西北長三丈餘三閱月而沒

四月甲申鈞州地震有聲至二十三日方止

五月火星畱守南斗越五日勅諭文武羣臣修省

八月南北直隸及河南山西湖廣江西浙江所屬郡邑凡

一百四十餘處各奏水患詔戶部勘實以聞

十一月乙丑夜月犯太微垣上將星

十二月丙子曉金星犯鍵閉星 癸未夜月犯左執法星

二年正月甲辰朔辰時日暈及左右珥皆氣赤黃色鮮明

七月順天保定開封青州四府大水

三年四月科道言近年以來或日月赤色或陰氣昏蒙或
大風激烈或黃霾蔽天遼東宣府四川地震雖各遠在
一方實關朝廷氣數况兩廣四川兵革之後南北直隸
水旱之餘公私俱困虜寇在邊此正側身修行思患預

防之時伏望以敬為所以愆自懲遊戲宴樂無益之事
節之以養聖心金豆銀豆無名之賞罷之以防國用萬
機之餘日御經筵講明聖學仍勅臣工同加脩省庶足
解天怒慰人心保受命無疆之休 上嘉納之

八月乙未夜火星犯壘壁陳東方第一星

四年五月京師大旱

七月己未夜北方有流星青白色光明燭地自閣道旁西
北行衝勾陳尾跡後炸散 有星孛於台斗

八月癸巳京師地震有聲 甲午月犯房宿南第二星

九月癸亥夜客星色蒼白光芒長三丈餘尾指西南變為

彗星 戊辰彗星見東北方 己巳彗星見西南方

丁丑昏彗星犯七宮等四星 壬午昏彗星入市垣

十月甲寅彗星犯天屏西第二星至十一月戊午始滅

五年正月乙丑夜月犯五諸侯南第一星 己巳夜月入

鬼宿犯積尸氣 戊寅月犯心宿

二月癸巳曉金星犯牛宿 丙申夜月犯木星又犯鬼宿

閏二月己未雨霾天昏蒙黃塵四塞是夜月犯昴宿

癸亥夜月犯積薪及木星 甲子夜月犯軒轅御女

己卯日變白土霾四塞 癸未夜瓊山縣雨雹大如斗

六月九日河決杏花營水及堤三司官具牲醴禱於河神

而漁者於河拾一卵守河者以布十疋易以獻眾觀之甚異以手撼之中汨汨作水聲其形大如人首下銳上圓質青白微具五色又多鰲黑點持之甚重氣煖而澤潤人不知爲何祥有占者云江湖見龍卵主大水吳郡劉昌謂龍有胎未聞卵生或曰蜿亦卵生茲固其類歟七月巳酉曉刻木星犯軒轅大星

十二月無雪

六年正月給事中郭鏗奏今年正月河南奏地震旣而掌太常寺事李希安奏甘露降俱下禮部尚書鄒幹等卽以甘露事上臣備位諫官不敢不言蓋遇災異則懼心

起悅亦祥則驕心萌懼則修德驕則怠政故聖人不食祥瑞春秋獨紀災異商之中宗高宗桑穀生朝雉雉晨耳因巫咸祖已之言恐懼修省變災爲祥故能享國長久商道益隆漢文景時日食地震山崩川湧星變之異未易遽數二君恐懼修省今年下詔勸農桑明年下詔減租稅以致民和氣應海內富安惟遇災而不知懼者亂亡隨之 皇上踐阼六載位列大臣職居典禮者當如巫咸之告君祖已之正事鄒幹等乃以先奏地震遲言不言顧以後奏甘露諂言瑞應跡其所存實懷容悅伏願以年豐爲瑞以民安爲祥以賢才爲寶遇災而懼

聞瑞不喜仍罷榦希安以謝天下禁天下不許獻言祥
瑞仍以地震天旱因災求言博訪政事缺失民間疾苦
以次施行使天下後世知 皇上不愛祥瑞不近諂諛
懼災修德其爲瑞應豈不大哉 上曰朕未以此怠於
德政郭鏗安得爲此言姑置之

湖廣地震

二月二十八日旦時微風自西北來至辰刻

漸大沙土滄然東驚其色正黃如柘染然土沾人手面
洒洒然如濕頃之天地晦冥色映窻牖間紅如血室中
不辨人已而紅色漸黯黑至午未復黃稍開朗人相顧
慘愕至三月三日微雨後忽黃氣四塞日色如青銅無

風而雨土拂之如塵積地皆黃色昏益甚明日大雨時
或紅黑至初六日始作東北風七日又雨八日始霽人
心乃安

三月寧夏大風揚沙黃霧四塞

癸未昏刻月犯金星

四月庚戌立夏雷未發聲陰霾四塞

大雨水

七月戊戌曉刻月犯昴宿

八月己巳廣東高雷二府地震有聲夜月犯天罇星

九月丙子朔曉刻金星犯軒轅左角星 甲午夜犯左執

法 己亥曉刻犯木星 庚子曉刻犯左執法

十月丙午夜東方流星赤色光明燭地自昴宿東北行至

井宿

七年立春日以星變避殿御奉天門便服進春免賀

二月丁卯曉刻月犯羅堰星

上以雨澤不降令羣臣條陳闕失 三月有星孛於天田

四月巳卯雨土霾夜木星入太微垣守端門

閏九月辛亥曉刻土星犯天高星

十一月彗見軒轅 彗星見出天田入太微垣大赦天下

十二月丁丑夜彗星北行其光益著橫掃太微垣郎位星

巳卯夜彗星光芒長大東西竟天自十一日北行二十八

度餘犯天槍尾掃北斗三公太陽 上避殿徹樂

丙辰立春昏刻彗星犯天河星

八年正月戊戌朔以星變免慶賀羣臣俱具朝服行公拜

禮 夜月犯軒轅左角星 癸酉曉刻月犯金星

二月甲申曉刻金星犯辰壘壁陳東第五星

四月京畿自二月至是月不雨大風竟日運河水涸

七月丙午隴州大風雨雹中有如牛者五長七八尺厚三

四寸六日方銷是月州之北山吼三日裂成溝長半里

吏部尚書姚夔言南京及浙江等處守臣各奏今年七月

狂風大雷雨江海湧溢環數千里城郭廬舍人畜田禾

多至漂溺况前歲妖彗示變水旱蟲荒山東河南湖廣

尤甚加之胡虜猖獗暴骨千里兵疲於奔命民困於供
億萬一姦人乘機扇亂禍將不測請命廷臣共修所以
安民弭患急務事下禮部尚書鄒幹會府部大臣議南
京承平日久宜勅守備叅贊大臣整飭兵備臨清地控
京師鳳陽接境淮安浙江福建連山濱海各宜簡大臣
巡撫其地三司郡縣官有不勤政務者悉行究治其濱
海兵民多以魚鹽爲生如肩挑馱負貿食者戒所司勿
禁災甚之地今年糧芻鹽課顏料草束俱令勿徵邊關
士卒率爲主將私役宜悉究其弊議上詔皆允行
十一月癸丑曉刻木星犯鉤鈴

九年四月河道侍郎王恕言去年自京直抵揚州南北三
千餘里水旱災傷今歲雨雪少降狂風彌月土乾麥稿
民不聊生三月四日山東地方忽暗黑如夜乞詔廷臣
講弭災卹患之策并祭告各處山川之神章下所司
六月河間府蝗廣平順德大名真定保定并河南懷慶府
大雨水

十一年二月癸卯曉刻月犯牛宿火星
五月乙卯昏刻月犯明堂中星巳未金星晝見於巳
六月乙酉卯刻日生左右珥重暈背氣皆赤青色鮮明
十二年正月辛亥南京地震有聲 南京科道以南京陰

霾蔽日地震有聲上疏修省

四月庚寅夜太原府地震有聲

七月初旬京師黑青見時坊巷細民家男女夜多露宿忽有物負黑氣一片而來或自戶牖入雖密室亦無不有至則人昏迷或手足或頭臉或腹背被傷出黃水醒始覺傷亦不甚痛數日遍城驚擾夜各持刃張燈自防有黑氣來輒鳴金擊鼓逐之初起於城西北人莫敢言及各城皆有始各訴於兵馬司巡城御史審驗乃具以聞止云不知何物所傷然多有見者云黑而小金睛修尾狀如犬狸蓋不啻二十餘枚兼旬始息上命設法捕

之仍戒人無得傳疑乃於禁中祭告天地曰臣以菲薄之資撫盈成之運顧政事多缺致災異荐臻茲者京城內外有物夜出殘害軍民驚動閭巷夫變不虛生必有所自意者用度不節致傷民財歟土木煩興過勞民力歟忠言不聞下情無由上達歟仁政不施實惠未能下究歟夙夜兢惕罔知攸措伏惟大造垂慈曲賜矜憫赦過宥罪轉禍爲祥俾妖物潛消居人安妥臣當祇謹天戒循省愆尤期維新於政令以圖報於大恩不勝惓惓懇禱之至大學士商輅等亦條上時政八事請付所司行之

國朝典彙卷百十四
災異
二七
一日蚤 上御奉天門視朝侍衛忽驚擾兩班亦喧亂
上欲起太監懷恩按之頃之乃定 按震澤長語云先
是黑青見相傳若有物如狸或如犬其行如風倏忽無
定或侵人面或嚙人手足未幾立西殿命汪直使偵外
事文武大臣多被僇辱或往南京或往北邊倏忽不測
人以爲黑青之應也

十月辛巳京師地震

十三年二月甲午浙江山陰縣地忽湧泉如血高尺餘

閏二月壬子夜月犯進賢星

巡撫南直都御史牟俸奏去年十一月南京大雷今春二

月安慶復有大雪雷電之異乞修人事以弭天變仍勅
六科十三道備陳致變之由 上曰陰陽愆忒雨雪雷
電不時皆政事不節所致况謫見南京警戒尤切今欲
修政事求直言應天以實所司其悉行之

六月京師雨錢

七月鞏昌平涼府諸縣隕霜傷稼

十一月杭州大雷雨虹見巡按御史侶鍾言月令八月雷
始收聲二月雷乃發聲今十一月初旬一陽始生正閉
藏之時而乃雷電交作虹霓出見皆爲非時乞加修省
事下禮部覆奏近年杭湖等府旱澇相仍今又值此災

變不可不預爲警備宜移文巡按及都布按三司等痛
加修省伸冤抑捕強橫撫恤軍民操練士馬從之
十四年八月御史范珠奏江北大水爲災漂沒田廬倒塌
城郭春秋傳曰大水者陰逆與怨氣并所致也伏望親
賢遠奸信賞必罰仍勅翰林院博稽往事陳致災之由
欽天監占候天象推災咎之應科道直言無隱吏部用
人無私法司鞫囚無枉戶工二部一切逋欠之物不急
之務宜停徵罷役及被災之處今年稅糧爲除豁以甦
民困 上曰所言皆已行之事所司其知之

是月戊戌早朝東班官若聞有甲兵聲因辟易不復成列
衛士爭露刃以備不虞久之始定莫知其故 上命御
史究其事所從竟莫能得也

十五年四月京師大水

五月乙卯常州地震有聲生白毛

九月丙子無錫常熟二縣地震有聲

十二月二十日夜金星犯南斗

十六年四月雲南麗江白石雲山裂半移金沙江中水溢
沒田廬

六月長樂縣昆由里平地突起小阜高三四尺人畜踐之
輒陷尋復於其左湧起一山廣袤五丈餘 按雙槐歲

抄謂其占女主爲男之兆唐武后時有此變今幸小耳
時昭德萬貴妃專寵每侍上戎服男飾以從上益
愛之此其應也

九月辛丑威州地震有聲夜四方流星大如盞赤色光
燭地自婁宿西北行至霹靂旁尾跡散

十七年三月禮部以二月初十日南京及江北四府山東
河南等府州縣俱同日地震有聲奏言考之傳記地動
千里有大災又云春動者歲凶二月動者水災今所動
不止千里又况鳳陽南京皆祖宗根本之地宗廟社稷
所在關係尤重乞行各處守臣理冤抑恤孤寡以消變
異儲廣蓄省費用以備歲凶濬河築河堤以防水患
毋徒事虛文從之

四月南京御史陳金等言南京地震有聲白毛頓長猛虎
近城傷人且當陽和煦時而寒風淒雨有類秋冬臣惟
根本重地災異獨甚皆大臣不職所致劾南京各部侍
郎劉俊馬顯李本祭酒王俱皆有干清議乞罷歸田里
給事中周紘等亦以爲言且及都御史胡拱辰鴻臚卿
李榕章下吏部覆奏俱畱治事

六月宿州民張珍妻王氏孕當產臍下右痛不可忍凡三
月而增劇至三月一日亥時腹畔右開裂生一男鼻準

中有黑痣一巡按御史周蕃上其事 按產不出戶者
釋氏以爲世尊及轉輪聖王之瑞而儒者以爲必無之
事實未必然今張珍事祝允明記之尹直瑣綴錄又云
二十年徐州一婦初孕肋骨下卽生一瘤漸長如核太
久之皮亦瑩薄兒遂從此產有司具聞月給膳米直往
來徐州見之此豈一事耶然所傳不同而皆有據嘉靖
末真定屬城有婦人於右肋產一男甚雄偉然六歲死
而前二人至長不聞有異天地大矣何所不有

十八年九月庚戌金星晝見於申

晉寧河王府自十七年以來每夜有妖見或爲神像或爲

王侯需索酒食時舉火將焚宮是年十二月十八夜
焚府第無遺冠服器用皆盡妖亦隨滅

二十年正月己丑朔星變地震勅諭羣臣同加修省指陳
時政利弊

三月甲辰新建豐城高安三縣大風雨雷電壞民舍宇民
多壓死

五月京畿陝西河南山東山西大旱分遣大臣賑恤之

二十一年正月甲申朔申刻有火自中天西墜化白氣復
曲折上騰聲如雷踰時西方復有火星赤色自中天西
行近濁尾跡化白氣曲曲如蛇形久之如雷震地

以星變詔赦天下

星隕有聲詔求直言

三月泰山屢震壬午朔四鼓大震是夜復震丙戌四鼓復

震甲午乙未相繼震庚子連震二次動搖有司奏聞時

椒寢漸繁上頗有易樹意而未宣露會欽天監奏言

三泰山震動應在東宮上大驚曰彼亦應天象乎曰陛

下即上帝東宮上帝之子也何謂無應上首肯始詔

二十年宮選妃儲始定五月廣東肇慶大水

焚劫策十月淮北上東大饑冬旱無雪

王翁需盡月京師大旱

東鹿縣昏刻天地昏黑空中聲如雷尋有黑氣墜地掘之

得黑石二一如碗一如雞卵

八月甲申夜金星犯亢宿

十月丙子五鼓有大星飛流起西北亘東南光芒燭地蜿

蜒如龍朝宁之間人馬辟易下詔求直言

弘治元年二月二十六日景寧縣屏風山有異物成羣其

狀如馬大如羊其色白數以萬計首尾相銜從西南石

牛山浮空而去自午至申乃滅居民老幼男女無弗見

者巡按御史暢亨言弭災二事一曰減稅利二曰除奸

弊

三月南京欽天監奏白晝太白守辰歲守巳

四月天壽山大風雹各陵樓殿厨亭并各監廳屋瓦獸角擊碎甚多禮部尚書周弘謨請修省 上是之

二年六月京城及通州等處大雨水溢軍民房屋傾倒人畜多溺死

三年十一月彗星見於天津 勅彗星垂戒朕與文武羣臣同加修省

給事中柴昇疏言災非倘來變不虛出如徵在君必謀何以建皇極大中之正徵在羣臣必謀何以秉進賢退不肖之公徵在四夷何以布綏懷保惠之仁其徵於權奸

也必思潛消預奪之機安在徵於貴戚也必思橫施濫恩之典當懲推此以往采人言而行之用禪政闕則事炳幾先患皆有備下所司知之

六年七月京師大雨雹大如彈丸小如粟棗平地壅積

七年二月命太監李興等修濬張秋河道各官初至祭河神天氣陰晦帛不能燃似焚不焚之處宛然人面耳目口鼻皆具衆共駭歎副使楊茂元聞於朝

五月宣府山西河南晝星隕

八年二月長沙府苦竹開花實如麥米楓樹生李實黃連樹生黃瓜苦蕒菜開蓮花七日而凋謝撫臣徐恪以聞

上曰災之道在修人事關朕躬者當自舉行爾兩京文武羣臣各處鎮巡等官尤當痛加修省勉盡職務共回天意毋事虛文

四月給事中呂獻上再災八事下所司知之

五月東南諸省大疫 七月西北諸省大旱

十月南京地震 十一月陝西貴州地震

十二月靖虜衛天鼓鳴河南江西大震電禮部以聞 上令兩京文武羣臣同加修省直言闕失

先是四方報災異禮部率類其凡歲終一覆以爲故事尚書倪岳乃以日月先後彙分條析未復援經史懇懇爲上言之

九年長寧縣民家楠樹上生蓮花李樹上生荳夾

六月山陰蕭山二縣同日大雨山崩水湧漂廬舍二千餘間死者三百餘人事聞 上命量免被災人戶徭役其滄沒人口者給米二石漂損廬舍者一石

十年三月禮部奏邇者山西陝西天鳴地震星隕京師去冬燠燠無雪火災迭見今春狂風陰霾日精無光山東以南亢陽爲虐二麥無成請通行內外諸司省躬思咎勉盡職務仍遣大臣祭告天地社稷山川及在外諸司各禱於封內山川 上命羣臣同加修省當言者直言

無隱內外不職官員科道巡按奏處

五月京師風霾各省天鳴地震詔求直言

六月久不雨 上減膳素食既而大雨羣臣請復膳

上曰亢旱為災實吾不德所致今雖得雨然苗稼焦損

必多縱食奚能甘味得乎民心則得乎天心今欲弭天

災但當謹於修己誠於愛民庶可答天之眷乃下令免

民今年田租

十一年六月京師西直門有熊入城守衛者不覺兵部尚

書馬文升謂野獸不宜入城奏叅守衛因乞嚴武備以

防不虞兵部郎中何孟春謂同列曰熊之為兆既嘗備

盜亦宜慎火同列莫曉未幾城內在處有火災禮部焚

既而禁中亦火乾清宮焚或問孟春此出何占書孟春

曰予不曉占書曾記宋人紀紹興己酉未嘉災前數日

有熊至城下州守高世則謂其倖趙允緇曰熊於字能

火城中宜慎火果延燒官民舍十七八余憶此事而云

耳不意其亦驗也

十三年五月彗星見

六部尚書各以星變乞致仕兵部馬文升不允吏部屠瀟

刑部白昂加太子太傅戶部周經禮部徐瓊工部徐貫

加太子太保俱致任

經以守正歸人多惜之

十一月大學士劉吉等言邇者玄象示戒妖星出於天津
考之載籍妖星見爲兵爲饑爲水旱死亾之徵今天下
連年風雨不調南直河南山西陝西旱北直蝗四川湖
廣皆薄收儻明年再似今年閭閻無豐稔之樂盜賊萌
竊發之機中原有事河道阻塞京城百萬生靈必致驚
惶禍亂之作亦不難也乞 皇上修省以回天意并陳
罷工役等事 上曰災變疊見朕深憂懼思圖消復惟
在恤民今卿等言天寒軍士久勞工役及燒造內官騷
擾地方誠宜停止其令金山口沙河橋南海子及王府
做工官軍人等俱與休息江西燒造磁官亦不必差
副朕畏天恤民之意

十四年正月朔西安延安慶陽潼關等處地震有聲韓城
尤甚聲響如雷傾官民房屋五千餘間壓死男婦一百
七十自朔至望震猶未息縣東安昌八里徧地決破湧
水裂地長一二丈或四五丈湧出溢流如河南京僉都
御史林俊上疏援古今徵應指斥時忌又疏乞錄正人
以教東宮因薦謝鐸儲瓘楊廉等堪爲輔導

二月兵部尚書馬文升言地道主靜動則失常考之古典
凡地震者乃坤不承乾臣不承君夷狄不承中國之兆
然亦未有震於元旦者未有裂地成河者此非常之異

古今所罕見也陝西四鄰番虜而延慶二府又密邇河套地震未已而胡虜乘之侵凌之兆亦已明矣且小王子部落日衆酋首火篩梟雄桀黠往往以詐計敗我官軍值茲民困財竭兵衰將懦之時而欲安內以攘外脩德以弭災亦甚難矣伏望祗畏變異修省克責節金帛以備緊急罷齋醮以省浪費止傳奉之官禁奏討之地陝西織造絨褐內臣蚤取回京以蘇軍民之困宗社生靈庶幾有賴 上曰覽奏具見忠愛所司即便施行

七月江西南城縣夜空中有火開而復合流光下墜長十丈餘隱隱有聲燬軍民廬舍三千餘間倉廩穀三萬九千餘石男婦死者三十三人事聞 上命修省賑恤

十五年十一月雲南晝晦五日勅南京刑部侍郎樊瑩考察雲貴諸吏凡罷遣千餘人

戶部員外席書疏言致災在朝廷不在雲貴在大臣不在小臣 上從之

十六年崇明縣民顧孟文家雞伏卵所出者猿頭而人形長四寸有毛能動而無聲亦毛孽也

五月京師大旱

十七年正月南昌新淦二縣火焚南昌民居一百五十家新淦焚公署四所軍民一千餘家事聞 上命鎮巡等

官脩省安撫

禮科都給事周璽等言霍雨初霽星變繼作皆陽微陰盛之象請親君子遠小人脩政事攘夷狄絕近倖之侵權黜姦貪之蠹國延訪輔臣及九卿以求理亂之幾務盡修省之實上曰星變事重所司卽看詳以聞禮部請如璽言乃命英國公張懋等祭告天地宗廟社稷十八年九月庚子恒星晝見十二月火星犯左執法正德元年正月朔京師地動天鳴五星凌犯星斗晝見白虹貫日羣災疊典併在一時

三月星隕如雨天鳴地震

七月巳丑彗星見參井掃太微垣戊戌乃滅 太白經天

八月大角大火中星搖動天璇天璣天權星晦

十月霾霧四塞

二年九月劉瑾禁各處有司官不許奏災異

五年六月京司旱霾

七月威州茂州等處地震有聲如雷旣而潼川州樂至縣皆震

六年十一月京師地震

七年黑青見形兼赤黑大者如犬小者如猫若風行有聲夜出傷人有至死者初自河間順德漸及京師人夜持

刀斗相警達旦不敢寢踰月始息

三月餘于之仙居寨夜大雷電以風西北有火如箭墜旗

竿上如燈籠光照四野戍卒因撼動其旗火直飛上竿

首卒因發火銳衝之其火四散闔寨鎗首皆有光如星

須臾而滅 五月廣西萬春北寨各槍上有光

八年三月文登縣秦始皇廟鐘鼓夜鳴火起桑上樹皮燔

而枝葉無恙廟宇燬而神像如故 是月流賊破文登

是冬燕趙河朔之地燠如春而江淮風雪特甚南至洞庭

水緩處冰有至尺厚者

十年八月江西省城藩司火災延燒萬室

十一年五月風霾大旱

十二年五月巳亥夜火隕於都察院獄旋轉久之始滅都

御史王璟以聞詔曰火隕獄中無乃刑罰失中歟爾璟

宜率厥屬脩省明慎用刑毋致冤抑以弭茲變

九月 上幸大同獵陽和雨雹星隕

十三年五月十五日常熟縣白龍一黑龍二自西北來天

地晝晦至榆市村乘雲而下目光如炬口吐火焰鱗甲

頭角皆現雷電猛雨席捲居民三百餘家船十餘舸墜

地蓋粉死者三十餘人酉戌時乘雲東去是夜紅雨如

注五日乃息

六月江西大水

十一月銅仁府平山衛范璽家黃犝牛生犢額豐齒巖膝足并尾俱成麟甲落地死又李華妻生男兩頭四手足良久死

十四年春京師風霾晝晦水溢

十五年正月彗星見五月江西大水

十六年正月有星孛於東南項之橫絕東西復爲鉤屈

六月北京山東河南陝西南直江北淮陽諸郡旱自正月不雨至于是月福建福州等府亢旱癘疫盛行府縣官病死者四十餘員軍民死者無算

七月四日遼陽湯站怪風雨驟作大水溢涌衝倒城垣三

十五丈壞道路三十餘里壓死十二人上聞曰災異

非常守臣宜痛加修省以回天意卽時賑恤

文安縣水忽僵立是日天大寒遂凍爲冰柱高五丈四圍亦如之中空而傍有穴後數日流賊過文安鄉鄉民入穴中避之頗賴以全土人謂之河僵

嘉靖元年七月南京風雨暴至江水俱溢傾陷民居數十百家城垣宮闕頽圯守臣以聞上諭南京羣臣同加

脩省

按萬曆十年壬午七月十三日戊辰至次日己巳大風

國朝典身卷之十四
拔木江海及湖水俱嘯湧常熟崇明嘉定吳江等處漂
沒室廬人畜以萬計考嘉靖元年壬午七月二十四日
亦戊辰至次日巳巳災亦如之又考是日俱有龍火之
異前壬午禍微輕而遠後壬午禍甚慘而狹要之六十
年內所無也周一甲子干支又同異哉
二年正月應天鳳陽山東河南陝西地震給事中黃臣上
言太監蕭敬久竊重柄復開傳乞之門地震之變職由
斯人乞速竄逐不報

三月時久旱風霾禮部侍郎賈詠請修省給事中安磐言
亢旱風霾變不虛生夫霾豈陛下明有所蔽歟旱豈陛
下澤不下宛歟開歲以來法官不聞露禱之誠外廷不
下求賢之詔非所以承天地子萬民也 上嘉納命止
齋醮及一切興造不悉之務遣官祭告天地宗廟社稷
山川復諭禮部曰亢旱久風霾不息二麥未秀秋種未
布朕心惶惶凡政令缺失軍民利病當興革者在內諸
司從實舉行當奏請者奏無諱戶部議處預備救荒事
宜撫按官督所屬問民疾苦加意存恤省刑薄賦整飭
武備修舉荒政盡心職業以稱朕敬天勤民至意
五月大旱自去冬不雪入春風霾迨夏益甚時京師復雷
震觀星臺 上命羣臣言時政得失御史秦武言皇上

近日以來或以養子而冒闕監之封或以內臣而奪司
 寇之職吏部之銓除阻撓既多法司之律令更易殆盡
 勅自中出而政府不得贊其詞法以私行而六曹不得
 據其志經筵則屢日告罷禱祀則不時修舉此天所以
 示異也南京給事中彭汝實言邇者黃風黑霧春旱冬
 雷天變於上者屢矣地震泉竭揚沙雨土地變於下者
 屢矣羣小漸長盜賊公行草妖木異人物之變屢矣昔
 人云怒予之天猶可為也忘予之天不可為也今燕閒
 虛費於女寵腹心委託於貂璫二廖諸張竟爾緩死李
 隆蘇縉猶得無恙鎮撫以報復而窘辱主事羅洪戴內

監攜私鹽而執解巡檢鄭景貴崔文狐媚豎羣枉之赤
 幟蔣輪狼貪為戚里之谿壑此皆失政之大而不能銳
 意修葺何望天意之回人心之感疏入不報

六月有屋宇於天市

八月河南大水時四方災異奏報頻仍 上曰上天示戒
 朕心憂惶特降勅諭同加修省凡關吏治民隱興利除
 害者切實舉行以回天意

三年正月丙寅朔南京地震有聲自前月下弦地震雷雪
 連日不絕至是復大震南京禮部侍郎劉瑞言地震不
 於他所而獨於南京不於他日而於立春元旦凡有耳

目莫不駭愕蓋南都天下之本而軍民又南都之本本安則天下安因條消弭六事欲發帑藏免逋賦督賑濟修祭告謹戎備端大本疏入 上嘉納之

是月丙子五星聚營室初元日丙寅歲填次營室丙子五星咸至辛巳日躔室初度月食於翼五星皆伏而太白獨先過壁光祿少卿樂濩時司欽天監上言曰自古五星之聚莫不有大禍福惟視人君德政淑慝何如耳占書曰五星之聚是謂改易王者有德受慶子孫蕃昌無德受殃失其家國百姓流亾天道無親福無常主故聚房周祚以昌聚箕齊桓用霸漢興聚井宋盛聚奎是四

者皆當更革之際一福一禍昭然在德惟天寶聚於箕而唐德弗稱旋有祿山之禍 皇上聖德中興五星適聚可不益修聖德愛養黎元以成大慶乎占書又曰天下兵謀則五星聚於營室凡內修紉攘以銷夷狄盜賊之謀者亦不可不加之意也章下禮部

四月禮部侍郎吳一鵬類奏四方災異言自二年六月迄今二月其間天鳴者二地震者三十六雷電雨雹者十八暴風白氣地裂山崩產妖者各一民饑相殺食者二非常之變倍於往時願陛下躬行明詔以先羣下救疾苦罷經營信大臣納忠諫以回天意 上云覽疏朕心

惻然事屬朕躬者朕自圖之有司其尚交修以弭天變
五月無極縣有怪風自西北來先紅後黑咫尺不辨人折
樹木雞犬亂鳴有頃震雷暴雨

房山地震順天府尹王軌言數月以來震於諸藩於南都
乃今於畿內浸近城闕陵寢災莫大焉意者宮闈預政
與宦寺涉權與匪人進用與民力勞瘁與兵荒相仍與
九重深居願加體察 上覽奏責其狂率下所司知之
五年二月時災異衆多畿內復饑禮部以聞 上降諭曰
四方災異非常朕心憂懼此非下民之孽皆朕之失云
福建諸處大雨水自正月至四月不絕平疇蕩爲巨浸

澄山鳴旗鼓自蜚知府汪文盛上其狀乞賜蠲且乞
罷以謝天譴章下戶部議賑從之

十月禮部言今歲四方災異臣等歷考史籍未有如今日
者冰雹害稼大如雞卵如杯楮者古則有之大如碗似
人頭古未有也捲掣廟宇及民舍至百數十家了無踪
跡又再三見於一鎮古未有也婦人懷胎生子三目或
四目或形體不全者古則有之至六目面有角手足各
一節獨爪鬼聲古未有也牛犢之產一身二首者古則
有之一身二首腹內心肺與胆各二且二三月間兩省
竝見古未有也虎入城市入民家猛惡噬人者古則有

之具人手足出沒倏忽不可防制古未有也雞生二雛
三足者古則有之前後四足古未有也其餘山崩水漲
烈火迅雷淫雨亢陽傷人害物其禍尤慘災不妄興必
有所召往年遇有災異不過齋戒祭告貶損服色而已
原天意所以示警豈徒欲責取文具爲哉臣願上下協
和痛加修省使官守言責各盡其職膏澤得下於民一
洗因循玩愒之習 上曰災變非常朕心驚惕諸司宜
實加修省毋事虛文其利弊興革事宜會官議以聞
是歲五六月江左大旱常鎮尤甚徐淮兗濟間大雨水田
廬盡沒至是禮部類報 上以災異頻仍諭羣臣修省
其利病興革事宜集議以聞

十二月大學士楊一清上言臣觀災異如遼東山陝江浙
湖廣地震不下二十餘次各處雨雹傷稼殪人南北直
隸旱荒爲虐山東豐沛洪水泛溢遼東有雷雨之變貴
州有山崩之警至於江南之人疴江西之虎怪鄖陽之
牛禍屢見疊出尤爲奇異豈惟近世未聞抑亦載籍罕
有稽諸傳紀考其證驗皆陰盛陽衰所致伏願 陛下
總攬乾綱以防欺蔽延訪大臣以資輔益覽諸司之奏
章辨臣下之忠佞仍戒飭諸司凡朝廷政事缺失天下
生民利病以至遺賢未盡甄舉忠直未盡收錄讒慝未

盡殄除幽滯未盡昭雪明白開陳悉心敷對 陛下廓
納善如流之量弘改過不吝之勇大要以恤民固本爲
主民心悅則天道和此老臣垂盡之年感恩圖報之愚
悃也 上勅諭嘉納一清復條陳脩省事宜一祭告以
竭修省之誠一寬恤以宣修省之澤一用人以資修省
之益一革弊以祛修省之害 上曰事關朕躬自有處
置餘命所司降勅頒行

六年六月甲子京師雨錢

七月壬辰南京雨血

七年五月北畿山東河南山西陝西大旱 上以災異頻
仍勅羣臣同加修省直言得失又諭輔臣曰卿等亦各

盡言仰體朕懷俯省已過於是言者頗衆不見采納大
學士楊一清上言諸臣條奏固多節財省費與民休息
之意亦有拾陳言者祗克故事立奇論者有礙措置間
有恤民數事又且報罷是 皇上應天以實而羣臣之
應詔以文也臣竊謂今日之務在省事不在多事在守
法不在變法在安靜不在紛更在寬厚不在煩苛昔人
有告其君曰爲國有不足懼者五深可畏者六三辰失
行天象屢變小人訛言山川崩竭水旱蝗虫不足懼也
賢士藏匿四民遷業上下相循廉恥道消毀譽失真直
言不聞深可畏也以爲不足懼者非真不足懼矣知其

可懼而修德弭之則轉禍為福深可畏者則以其變無形而禍甚烈勢若緩而伏最深今日之弊實恐墮此臣舉其急且要者曰舉賢才以克任使曰收人心以固邦本日求直言以防壅蔽而已上嘉納之降旨曰覽奏具見忠愛舉賢才固邦本二者誠為急務吏戶二部即查照議處以聞科道官以言為職今後一切利弊務據實直言不得浮謬朕當采納施行

十二月望白氣亘天起乾指坤

八年正月戊戌朔風霾晦如夕

立春日長星出白氣亘天風霾晝晦

二月不雨上雩禱不應製自咎說示羣臣使咸加警惕

湖廣襄陽大饑

七月長庚氣如匹布亘天山西大饑

十一月河南陝西大饑

九年四月北畿河南山西湖廣陝西大饑

十年六月乙巳彗星見東井

十一年正月朔夜星隕於衛聲如雷彗星再見十八日青

州地震聲吼如雷十九日尋甸府六涼衛地震倒塌城

墻房屋

三月彗星見肅州衛星落有聲四月雲南府地震

五月鄒縣天鼓如雷火光落地六月陝西隆德地震

八月彗復出東井芒長尺餘後東北行歷天津星宿光漸

長至丈餘埽太微垣諸星及角宿天門至十二月甲戌

凡一百十有五日而滅禮部奏乞修省上下諭曰彗

星三見妖必有由上天垂愛朕祇承夙夜罔敢逸寧爾

文武羣工責同翼贊可不懲艾匡予一人其九卿大臣

宜各自投劾聽其去留用彰盪滌之義仍各條陳所見

共致消弭自二十一日始淺衣辦事三日

十月七日夜星四亂飛落

十二年正月隆慶右衛地震如雷

六月彗星見五車芒長五尺餘尾背西南

己亥彗掃大陵及將軍芒長丈餘大學士張孚敬因上言

彗復出於昴畢之間變不虛生皆臣等奉職無狀所致

除自陳外令通加修省上曰彗星為異退而復見者

四上天垂戒敢不祗懼謹擇日於殿陛祭告文武羣工

宜痛加省慎贊朕不逮上回天意於是禮臣請榜示大

小臣工以二十日為始青衣朝參辦事至告祭後三日

而止上從其言仍勅文武羣工俱與有天工之責各

痛滌乃心秉公持正以贊朕躬勿視為故事

十月丙子夜流星如盞大赤色光燭地起地台東井行至

地津跡化白氣而散四方大小流星縱橫交互竟夜

辛巳星隕如雨

十二月禮部奏災異地震八大星隕有聲三天鳴一雷震

殺人山東牛生犢身有文前足有五手甲貴州民生男

兩頭四足四手

禮官復言類奏災異累朝舊規歷年以來申飭修省今聖

德謙冲似蒙采聽而於內外臣工無所施行將謂 陛

下以災異為諱以修省為虛非所以謹天戒明常憲而

昭示天下也 上曰災自朕召敢不省懼內外臣工各

宜悟改即通行文示悉

十三年閏二月金星晝見先自前十一月見至是日光耀

與日爭明 七月三日彗星見

十五年三月戊午客星見於天棊星旁 上諭大學士李

時曰今紫微垣有客星不知主何事應時曰古人謂天

道遠人道邇事應之說起於漢京房未必一一合但在

人君修德以應之景公一發善言災惑退舍况 皇上

修德之所感乎 上嘉納之

京師及永平保定諸處俱地震有聲如雷 上諭禮部曰

朕懼上天宜加修省自今日始青衣黑帶靜處三日露

告於天賀喜其罷之其遍示文武羣臣痛加修省尚書

夏言上言聖嗣誕生天下大本所係臣民鼓舞仰戴皇天降祐之祥茲遽罷免稱賀不惟不足伸臣子慶幸之私其於重國本答天眷亦若有未盡者請俯察羣心曲從愚懇仍於修省之後御門受賀庶仰答天戒丕承天休並行不悖上乃許之

十七年四月八日未刻吳城忽烈風迅雷冰雹如注其大如李中有一竅而四圍皆紋至西陽山一境又大如斗途人不及抵室或中其頂及耳而傷亦有至死者

十八年四月彗星見芒長三尺指東向掃軒轅北第八星旬乃滅癸亥金星晝見

五月以星變請行祈禳禮并令大臣自陳諸鎮守內官盡數取回

十九年四月乙巳京師風霾時黃霧四塞俄紫赤色忽暴風從西北起勢如崩崖文德坊及西長安街坊各城旄旌柱俱折夜分乃息上曰風霾之變上天示戒本朕自致羣工百職亦宜警省災變有數殆莫可逃朕觀此異凡三見矣占謂主兵喪火西北邊防不可不慎兵部議以聞

九月壬子熒惑入南斗數日乃去

十月水土金星聚於角十二月戊午太白經天

二十年七月有火毬大如斗隕左軍都督府中門左良久滅

二十一年八月丁酉熒惑掩南斗

二十三年六月災惑犯南斗

二十五年京城大水

二十六年歲星守營室

六月大同先有大星其光如炬向東南流俄而天鼓鳴

十月澄城縣麻陂山先大鳴如雷晝夜不絕歷三日山崩

一百丈劈裂中半而下東西分馳三四里遺址平陷

二十七年正月 上諭輔臣陝西奏災異云山崩移且非

辛未日風沙大作曰主兵火有邊警朕惟氣數固莫能逃然亦不可坐視况 上天示象儆戒昭然而防備

消弭當盡人事朕居君位總理於上無親事之理本兵等皆各有專責卿等其宣示朕意俾皆悉心經畫朕乃

仰叩 玄慈冀轉災爲福云於是禮兵二部各上疏請修省 上諭禮部以宣諭百司修舉實政諭兵部以戒

飭各邊益慎防守用答上天仁愛之意

七月京師地震

大同右衛叅將馬繼宗舍人馬祿女年十有七將適人化爲男子撫按官以聞

八月京師地屢震求言

三十一年六月雷州遂溪諸縣風雨驟至雷震火光如毳自西南起至中天星散海潮泛溢壞官民廬舍及人畜田禾無數

冬日下有赤氣 各處地震

三十三年四月慈谿縣地湧血高二尺餘 六月京師大水平地丈餘

三十四年十二月山西陝西河南同時地震聲如雷雞犬鳴吠渭河華州朝邑三原蒲州等處尤甚或地震裂泉湧中有魚物或城郭房屋陷入地中或平地突成山阜

或一日連震數次紫日震不止渭河泛漲華嶽終南山鳴河壅數日壓死官吏軍民奏報有名者八十三萬有奇時致仕南京兵部尚書韓邦奇光祿卿馬理祭酒王維禎同日死焉其不知名及未經奏報者不可數計是時秦人皆露處而晉災尤甚於秦浙中訛言馬祖師術有物如蝴蝶入人家變幻飛走禦之則刀仗傷人夜魔人至死官捕馬道士不得

晦日光忽暗青黑紫色日影如盤數十相摩視久則百千飛盪滿天向西北散易卦驗云愚智同位日月無光

三十五年正月夜彗星見於進賢星旁莖長尺西南指漸

長至三尺餘歷掃太微垣次相星又東北行入紫微垣掃天床星至四月二日始滅

二月禮部以山西河南同日地震請如例修省九卿科道許極言時政得失凡可以救災恤民者條奏其被災地方遣大臣一人祭告境內名山大川河雒之神及祀典所載神祇其死者收瘞爲厲壇以祭之 上是其議乃命戶部左侍郎鄒守愚往

九月杭州火府城東南隅及郭外大火官民廬舍焚燬數千區死者甚衆

二十六年八月陽穀地湧血高尺餘 十二月兖州地震

三十七年三月河南地震有聲 四月密雲地震有聲

五月東陽縣民張思齊家地裂五六處出血如線高尺許血凝犬就食之掘地無所見巡按御史王國本總督侍郎胡宗憲各上其狀因言往歲慈谿曾有此異未幾有海寇之殃今諸寇未息而東陽復爾可爲寒心乞勅大小臣工一體警備從之

蒲州潮州各地震 六月遼東大水 七月南陽地震

閏七月淳化諸縣雨雹

三十九年二月竹谿縣地震出血 四月寧夏地震

六月香山新會等縣地震有聲

四十年五月蘇松嘉湖霪雨彌月湖陂俱溢平地水深丈餘稻蒔俱沒

四十二年二月京師大風 上諭閣臣曰今日之風占主兵火似不可以常視其傳諭博示諸臣內戢凶賊外嚴邊備閣臣以示兵部尚書楊博等覆奏曰 陛下偶以風異軫念內外申飭臣等以安攘之事臣惟今日內地雖稱歲稔然數奉寬恤之詔遠邇晏然保無他慮惟是東虜玉蠻欲犯古北臣已檄許倫調度拒守在大同則有虜酋俺答自西海東還住牧豐州聲言欲犯左右衛臣已檄李文進設策防禦今復用明詔申督之內外諸

臣奉行惟謹當不至仰煩聖憂報聞

十二月京師大風占在土功

四十三年正月是夜大風 上諭兵部曰此風未為無謂非四時之正也上天恩示其慎承之次日又風 上復諭曰兵旅可用心否十路可聞二三齊否若徒往來文書何益於事昨二次風異必非無應恩示宜小心承之於是尚書楊博等覆請先備宣薊次之各鎮務在萬全以紓聖憂 上曰邊防當慎已屢有旨宜令劉燾等悉心幹理軍管亦宜選練毋以文應取罪

六月黑虹見北方

災異

四十八

十一月旱風霾大計京官

十二月北畿山東大饑 連歲茲歉是歲尤甚

四十四年三月時 上久御西內思成官每有黑氛出擾

而披攔藻井上忽見木綿數團心疑之諭徐階內火當

慎且曰天佑無象惟逆邪作祟不可不為之防階慰解

之至是聖體違和中氣不足面頰作痛諭階知之

四十五年正月戊申大風揚塵四塞 上諭輔臣曰今日

四風色甚異宜傳示本兵預防兵火 金星晝見

五月朔木星逆行雷太微垣左執法 大風霾晝晦

湖廣水破均州城提督太和山太監呂祥乞賑恤從之

隆慶元年三月戊午夜木星逆行守亢宿

四月平虜衛地震

六月乙亥夜月犯畢宿右股北第一星

十月癸未夜金星入南斗

二年元旦大風走石晝晦自京師達江浙江南訛言選宮

女每三十領以一寡婦民間室女嫠婦不問老少各婚

配千里鼎沸士大夫亦為之 金星晝見

三月新城空中迅響如雷 懷慶天鼓鳴 遵化雨雹

子大損麥 京師地震百官青衣角帶辦事三日

四月萬全衛晝晦雨雹擊牛馬皆死

五月給事中何起鳴奏西安府地震如雷平起小遠望城郭灰塵蔽天垣屋欹側至涇陽咸陽高陵城無完室因陳納諫恤災邊防守令實政聖德六事乞蠲二年稅糧報聞御史周弘祖言各省地震有聲裂爲溝渠水溢泉湧旗竿數火天鼓再鳴隕星旋風天雨黑豈臣以地陰也以安靜爲德水亦陰也以順下爲常洪範傳曰人愆怨則水湧溢翼奉曰極陰生陽不旱則火胡氏春秋五石隕宋緣 皇上卽位二年未嘗召見輔臣延訪治道虞患孔棘備禦無方事涉內臣遂多撓阻黠馬則免清查則免皇莊則親收子粒太和則權取香稅織造之使屢遣糾劾之疏畱中皆足以招災異者不報

是月山西巡按宋纁奏太原府靜樂縣民李良雨娶妻數年以不和離異後或以病遂化爲女經脈行流與本村民白尚相奸配其弟良雲以事上所司

六月浙江福建四川陝西淮安鳳陽等處大旱

京師河南河東宣府馬韋堡諸所皆大雨雹夜見火光南
京給事中張應治以災異頻仍條陳修弭七事曰勤政
親賢立信足兵食平盜賊復軍儲察幽枉大意言天心
仁愛人君禳災不當專責臣下而前三議勸 上革內
批罷遊幸召還織造內臣語甚切直 上意頗不懌

十一月丁丑戌時太原府有星如斗大尾長二丈餘從東北起往西南去隨聞天鼓聲是夜交城一星落且火光自東北往西南落亦天鼓鳴

十二月禮部類奏災異尚書高儀上言今歲四方災異比往年特甚山西天鳴地裂男子化女浙江水旱尤爲異常宜痛加修省上曰朕夙夜兢惕不敢怠荒爾臣工務實心體國共圖消弭以仰承仁愛之意

三年五月給事中戴鳳翔上言頃見京師木冰其占爲兵視他異尤裂因陳弭盜安民要機六事禮部因類奏災異并覆鳳翔疏請行內外諸臣痛加警省仍勸上勤

政事虛聽納以仰答天戒上納之

台州府颶風大作海潮汎漲天台諸山水驟衝入府城三日迺退溺死人民三萬餘口衝決田地一十五萬餘畝蕩析廬舍五萬餘區

平陽府絳州奏西北天裂自丑至寅迺合

鳳翔平涼西安慶陽等處地震千里傾壞城堡傷人畜甚衆

四年四月京師地震禮部尚書高儀等請令百官修省青衣角帶辦事三日仍勸上親賢遠佞勤政講學以佚欲爲深戒以勵精爲遠圖黜粉飾之彌文崇交修之實

政 上曰災變非常委宜知儆事關朕躬當自加慎爾等百司其痛加修省勉盡職業毋事虛文

永平府樂亭縣遼東寧遠衛遵化順義等縣山東登州同日地震樂亭裂二所各長三丈餘黑水涌出寧遠城崩

五年三月廣西布政司後街宗室住宅忽地陷一丈寬二丈餘又王府大街地陷二丈深廣數尺又布政司後堂

地陷四尺餘橫二丈五尺直一丈六尺

附殿災

吳元年七月己丑雷震宮門獸吻得物若斧形而石質

太祖命藏之出則使人負於駕前臨朝聽政則奉置几

案以祗天戒

洪武十三年五月雷震謹身殿詔告天下曰朕以菲德托

於萬姓之上奉天勤民於茲十有三年矣間者宰輔非

才肆奸亂政朕思創造之艱難念民生之不易按法誅

之恐陷於不義者於心未安昧於知人實朕之過上天

垂戒朕甚懼焉可大赦天下 六月雷震午門

建文二年八月承天門災詔求直言未幾乙字庫災

永樂十九年四月奉天華蓋謹身三殿災時言者多云建
都北京非便主事蕭儀言之尤峻上震怒加以極刑
時六科十三道上言亦云朝廷不當輕去金陵建都於
燕故有此變上曰方遷都時朕與大臣密議數月而
後行非輕舉也言者因劾部院大臣上命言官與大
臣俱跪午門對證日將午上命中使出問大臣與言
官對辯如何衆皆紛然啐罵言官妄言尚書夏原吉獨
從容奏曰御史職當言路給事中朝廷耳目之官况應
詔陳言所言皆當臣等備員大臣不能協贊大議臣等
合當有罪中使入復命上悅遂兩宥之或尤原吉

初議原吉曰不然天威嚴重吾輩歷事久言雖失實
上憐之若言官得罪所損不小衆皆嘆服

時夜殿災大學士楊榮直入麾衛士遷御書圖籍於東華
門上諭之曰昨夜火發在目前者幾人卿能收拾圖
籍可謂歲寒松柏也榮謝曰職分當然賜銀酒鍾古銅
器鈔幣諸物

正統八年四月雷震奉天殿鳴吻

十四年六月丙辰夜雷電大震風雨驟作南京謹身殿火
起延及奉天華蓋二殿奉天諸門皆燬次日臺殿生荆
棘高二尺下詔赦天下

天順元年七月六日承天門災下詔責躬大赦天下岳正
草詔歷陳弊政詞極切直天下傳之

成化三年六月雷震南京午門正樓給事中黃醜等言南
京乃祖宗創業之地邇者午門正樓爲雷雨所壞實上
天示警御史丁川等亦以爲言 上曰朕當勉之因勅
諭兩京文武羣臣同加修省

九年七月東直門火

二十三年六月雷震南京午門

弘治八年九月孝陵災

十一年十月乾清坤寧宮災詔求直言大學士李東陽等

疏竊見頃年災異頻仍內府火災尤甚軍器庫火番經
廠火乾清宮西七所火內官監火而清寧宮之災尤爲
大異古先聖王遇災而懼避殿減膳責已求言修政事
明賞罰然後可以轉禍爲福變災爲祥本朝 列聖具
有故事急宜舉行向來姦佞熒惑聖聰妨蠹聖政以致
賄賂公行刑賞失當紀綱廢弛賢否混淆賦役繁興科
派百出公私耗竭軍民困憊而大小臣僚被其脇制畏
罪避禍箝口結舌下情不達上澤不宣愁嘆之聲仰干
和氣災異之積正此之由今天道昭明元惡殄喪聖心
開悟洞察前非然餘慝未除宿弊未革雖聖仁廣大姑

示含容而中外人心憤鬱未釋故上天仁愛復有此異
伏願大開離照獨運乾剛進賢黜姦明示賞罰當行之
事斷在不疑無更因循以貽後患尤望特降綸音戒諭
臣工痛加脩省廣求直言指陳時弊並垂採擇次第施
行以收人心回天意 上悉從之

正德元年三月雷震南京東安門皇牆脊瓦併大報恩寺
六月辛酉雷震郊壇門太廟奉天殿

九年正月乾清宮災

十六年五月日精門災給事中邢寰等以日精門災又久
旱不雨請修舉實政以回天意 上嘉納之仍令禮官

擇日禱雨既而未及禱而雨降 上喜命官告謝天地
及山川社稷之神

嘉靖元年正月己未清寧宮小室火時郊亭甫畢風急不
可撲滅大學士楊廷和等因上言火起風烈殆為天意
况迫清寧後殿豈非 興獻帝后之加稱 祖宗神靈
容有未悅者乎給事中鄧繼曾上言五行火主禮今日
之禮名紊言逆陰極變災臣雖愚知為廢禮之應也主
事高尚賢上言郊祀甫畢卽有清寧後宮之災意者
興獻帝后之稱於禮不能無疑復以皇字稱之尤為過
越鄭佐亦言鬱攸之災不於他宮而於清寧之後不在

他日而在郊祀之餘變豈虛生灾有由召上覽之心
動乃從廷和等議稱孝宗爲皇考慈壽皇太后爲
聖母興獻帝后爲本生父母而皇字不復加矣

給事中朱鳴陽疏曰清寧後室火雖曰小灾實關大體臣
妄意揣度典禮失中與直言廢棄與爵賞太濫與刑罰
縱失與外戚驕盈與近幸干政與有一於此皆足召灾
况茲數愆各有指驗昔孔子聞魯灾知爲僖宮踰禮故
也漢傳太后欲與成母等號火焚其居鴻寧殿今茲之
火切近清寧豈非大禮不可踰而人言所當恤邪蓋禮
既徇私則直言始不見用希進者恃藩邸之私而冒濫

始多亂政者恃調護之私而大法始廢外戚恃宮掖之
私始妄請求貴近恃逢迎之私始得干預孔子名不虛
之論至是無一不驗矣惟皇上仰畏天變俯恤人言
推灾之所自起以端其本釐其弊庶足以回天意不報

禮部尚書毛澄言 皇上郊祀甫畢禁中失火密邇青宮
變不虛生宜應之以實法成湯之自責效周宣之側身
思禮樂教化之或愆念慶賞刑威之有失克其懼災憂
患之心而致夫順天悅親之實 上曰上天示戒朕心
警惕與卿等同加修省以回天意

四年三月仁壽宮災 昭聖皇太后所居也時火起延燒

玉德安喜景福諸殿 上乃減膳撤樂素衣避正殿告
於天地宗社諭令羣臣同加修省

十年正月大內東偏火 上諭告於天告於祖考火自宮
人郭氏屋延燒東西十四連房俱盡 上諭大學士張
璠宮中地隘而屋衆且貫以通棟所以每有火患聞南
京宮中皆磚砌不用木固知 聖祖慮深今所毀者不
須依舊式未毀者量爲規畫務使道塗疎豁堂舍整簡
勿令相近門俱如南京制斯免驚擾耳尋復爲火警或
問一篇示璠以明善惡別忠邪自勵云

四月兵工二部灾諭禮部曰火灾惟因人不謹所致不可
不加敬畏卿等宜加深省毋事虛文仍青衣朝參三日
朕以自省與卿等共圖休兆復責兵部平日不奉公守
法致召災變責工部坐視不卽撲救詔錦衣衛逮兵部
侍郎陳洪謨武選郎中黃禎員外馬坤主事袁袞楊且
并吏阜江桂等送鎮撫司拷訊他司俱停俸一年

六月雷震午門西角樓及西華門城樓西北角柱 上御
製祝文行露告禮於殿陛諭羣臣同加修省

十三年六月南京太廟災時風雨交作霹靂震響後殿西
南角并前殿西北角火起延燒東西廡廊及神厨庫基
一百三十二門金銀祭器冠頂袍服俱燬守備太監等

國朝典彙卷一百一十四
禮部
六
瓚以聞。上曰：南京祖宗根本重地，宗廟尤重。朕聞災變不勝警惕，五廟神靈必須奉慰，乃行告天禮於殿。陛畢，卽詣太廟，恭慰神御。諭內閣曰：慰廟之禮，有謂必待擇日齋沐，乃可舉行。此禮之常。今因災而祭，禮之變也。譬人或遇災，子必奔諸父母以慰安之。奚待正衣冠而後行？禮部請遵舊規，下寬大之詔，求忠讜之言。九卿諸大臣各宜自陳以候罷免。上曰：寬恤詔書去歲已布。諸司有事關修省者，各條具以聞。御史鄭坤言：周易震爲雷，其象曰：君子以恐懼修省。離爲火，其象曰：大人繼明照四方。聖經備載其理，昭著固非若漢儒泥於禍福。

依咎之穿鑿，諸家滯於小說識緯之尅，應惟陛下觀玩自能轉禍爲福。變災爲祥。因條上八事曰：修政曰崇祀，曰興滅，曰尚實，曰重本，曰仁武，曰嚴考，曰審官，下部議。十五年四月雷擊南京西上門獸吻，震死男婦十餘人。十六年五月雷震謹身殿，鴟吻大臣疏慰。上諭輔臣曰：上天示戒於謹身殿，實朕所致。卿等具奏問慰已悉，忠愛但雷火非人爲，必有修省宜當如何可錄示郭勛及禮部。禮部言：謹身殿卽古露寢，天子肅容之所也。上天示變於此，爲戒甚明。自本月二十二日始至二十四日止，修省三日，更當求刑政之失，改之以爲消弭之實。至

關國家利害大計仍許諸臣指實陳奏採納施行在京
 堂上官令照例自陳庶應天以實而災異可消得旨上
 天垂戒朕切感懼致招在朕勿以他諉朕與卿等修省
 如例大臣不必自陳各衙門大小官俱要思盡厥職如
 果有係國家大計各自陳說來行

大謨載雷火着殿上燔焚都盡

十八年二月 上幸承天次衛輝行宮火延及御寢闈婢
 死者十餘人越三日行殿復火
 六月丁酉朔雷震奉先殿擊殿左吻并鼓樓毀 上召大
 學士夏言顧鼎臣往視時畧已移辰言等尚未入政府
 上不悅曰輔臣朕所憑倚恣逸若是何以表率命禮部

劾之言等請罪 上曰朕每寬言過非為言為左右義
 重也言乃滋傲惰蔑不知警何以表率百僚鼎臣亦相
 效既知罪始宥之自後諸司敢肆過蹈非者部院叅奏
 相黨護者連坐既而 上祭告戒諭羣臣同加修省
 二十年四月辛酉夜宗廟災 成廟 仁廟二主燬是日
 未申刻東草場火城中人遂訛言火在宗廟薄暮雨雹
 風霆大作入夜火果從 仁廟起延燒 成廟及 太
 廟羣廟一時俱盡惟 睿廟獨存 成仁二主以火所
 從起不及救故燬 上哀痛不能自勝明日百官各疏
 奉慰禮部請 上親祭告內殿以慰神靈復引過奏祭

上帝以謝譴告青服御西角門延見羣臣以共謹天戒
下哀痛之詔以安人心行天下宗室共加修省以盡一
體之誠勅內外臣工痛加懲勉以致交修之儆文武羣
臣有奸欺負國蠹政殃民者聽言官指實奏劾九卿及
各衙門四品以上令自陳科道官極言時政得失特賜
采納暫罷內外一切工作蓄財力以圖修復 上曰宗
廟災燬罪在朕一人仰戴 皇天仁愛卽齋戒擇吉奏
謝南北郊祭告景神殿 太社稷躬行遣官祭告朝日
夕月等神陳言時政言官常職何待災變一切工程除
欽定殿就緒外並令停止奉謝畢次日御門視事如故

各廟主暫奉安於陵奉題還安各廟儀物卽行補

巡視皇城科道官胡汝霖聶靜李乘雲劾奏諸大臣聞災
不赴救當 太廟將燼時大學士翟鑿禮部尚書嚴嵩
翊國公郭勛景山侯崔元工部尚書甘爲霖刑部尚書
錢汝京吏部侍郎張潮戶部侍郎王杲副都御史胡守
中始入 憲廟神主燬時禮部尚書溫仁和兵部侍郎
陶諧刑部侍郎吳山大理少卿梁尚德始入其成國公
朱希忠兵部尚書張瓚樊繼宗左都御史王廷相戶部
侍郎任洛禮部侍郎孫承恩馬汝驥兵部侍郎王以祈
刑部侍郎王竣副都御史張珩掌通政司禮部侍郎陳

經大理寺卿牛天麟則俱未入嚴加飭罰以爲怠緩之
戒上曰所劾大臣不疾入救火是矣然今日大臣不
止疏名數人而又爲二三等分劾大臣與君義均休戚
原無等殺簡諸左右不在常例正當上天垂戒之時猶
敢欺罔誣人如此平日可知其不到文武大臣張溶等
不思宗廟重地不知大義不行疾趨救護忍心廢義本
當查究但事在夕初禍出意外姑從寬宥汝霖等論劾
不實令錦衣衛執送鎮撫司問已乃謫汝霖爲太平府
經歷靜建平縣丞乘雲太倉州判於是郭勛崔元翟霖
嚴嵩等合疏奏言災時方供事祈禱內壇赴救時早督

同 太廟等內臣亟奉神主北長安門汝霖等與臣始
入 上曰卿等力竭齋誠贊朕禱雨日夕左右夫誰不
知彼說者指事且禱爲民食非聲色游娛非卿導諛縱
使臯夔生今亦自如此羣小輒乘機中傷可嘆勿爲介
意第與朕同加修省上答天意

三十六年四月 日申刻大雷雨至戌刻火光驟起由奉
天殿延燒華蓋謹身二殿文武二樓奉天左順右順午
門及午門外左右廊盡燬至次日辰刻始息 上大懼
明日大臣奉慰 上報曰上天垂愛朕戰懼莫知所措
無前大異何以飾詞然子職最親不可不祗承仁示卿

等奏慰具悉忠切罪在朕躬安可他諉惟感懼為慎耳
 四十年十一月萬壽宮災萬壽宮在西苑本成祖舊宮
 自壬寅宮闈之變上即移寓於此不復居太內是夜
 火作禁衛皆不救乘輿服御及先世寶物悉燬
 四十四年三月西千步廊火上諭輔臣徐階曰昨火處
 乃史積近地他日纂修何稽焉當預計焉階言據實監
 左祿云正德十六年以來內外題奏及四方番文計八
 十三萬二千餘本俱貯六科廊內其千步廊所積乃先
 朝遺疏已經纂修者不必別有計處上然之
 隆慶二年承運庫火累朝寶物俱燬

不附日月食

洪武元年五月庚午朔日食
 二年五月甲午朔日食
 四年九月庚戌朔日食
 七年二月丁酉朔春分當朝日日食數盈已亥習行禮釋
 奠先師孔子亦改於次丁日
 八年七月癸巳朔日食
 九年七月癸巳朔日食
 十年十二月乙巳朔日食
 十一年十二月乙巳朔日食
 十四年十月壬子朔日食
 十六年正月巳巳朔日食
 八月壬申朔日食
 二十一年五月甲戌朔日食

二十二年九月丙寅朔日食

二十三年九月庚寅朔日食

二十四年三月戊子朔日食

三十年五月壬子朔日食

建文二年三月丙寅朔日食

永樂元年正月禮部尚書李至剛奏月當食不食請率百

官賀 上曰王者能修德行政任賢去邪則日月當食不

食適以陰雨不見豈果不食邪勿賀

四年六月朔日當食陰雲不見禮部尚書鄭賜請表賀

上曰此朕恐懼修省之際何可賀又曰於此一方陰雲

不見天下至大他處見者多矣且陰陽家言日食而陰

雲不見者水將為災以此言之可賀乎乃止

五年十月辛巳朔日食

六年四月巳卯朔日食 十月乙亥朔日食

十一年正月辛巳朔日食免朝賀先是鴻臚寺奏習正旦

賀儀 上召禮部翰林院官問曰正旦日食百官賀禮

可行乎尚書呂震對曰日食與朝賀之時先後不相妨

侍郎儀智曰終是同日免賀為當楊士奇曰日食天變

之大者前代元正日食多不受朝宋仁宗時元旦日食

富弼請罷宴徹樂呂夷簡不從弼曰萬一契丹行之為

中國羞後有自契丹回者言虜是日罷宴仁宗深悔今

免賀誠當 上從之

十二年正月丙子朔日食免朝賀 六月壬寅朔日食

十一月甲午朔日食 十四年五月壬辰朔日食

十五年四月丁巳朔日食 十月癸未朔日食

十八年八月丁酉朔日食 十九年八月辛卯朔日食

二十年正月己未朔日食先是 上諭禮臣曰日食天變

之大者况在正旦永念厥咎凜焉於心卿等宜各修厥職以匡輔不逮

二十一年六月庚戌朔日食

洪熙元年十月丙寅朔日食

宣德五年八月己巳朔日當食陰雨不見禮部尚書胡濙以爲卽同不食請羣臣賀勅曰古者人君所謹莫大於天戒日食又天戒之大者惟能修德行政用賢去邪而後當食 食朕以菲德嗣承大統政理未洽民生未遂上累三光祗懼惟甚可比於是歟傳不云乎君子之過也如日月之食過也人皆見之更也人皆仰之今以陰雨不見得非朕昧於省過而然歟况離明照四方陰雲所蔽有限京師不見四方必有見者比之不食天可欺歟朕圖修省仰答天意尚賴羣臣匡其不逮其止勿賀七年正月辛酉朔日食勅免朝賀

十年十一月朔當進正統元年大統曆以是日日食移於
十二月朔

正統四年八月丙子朔日食 五年正月甲辰朔日食

是年歲暮勅羣臣曰欽天監言正統六年正月朔日食

九卅一秘故事食不一分者不救護朕惟事天之誠雖

微必謹敬天之變豈以微怠况茲歲始陽德方亨致災

有由敢忘祗畏是日悉免賀禮及期救護如制

六年正月己亥朔日食 七月丙申朔日食

七年六月庚寅朔日食

八年六月甲申朔日食 十一月壬子朔日食

九年十月丙午朔日食 十年四月壬寅朔日食

十一年四月朔日食 十二年八月朔日食

十三年二月朔日食

景泰二年六月朔日食 三年十一月己未朔日食

五年四月朔日食 六年四月朔日食

天順二年二月朔日食 四年六月乙亥朔日食

閏十一月望月食四分有奇欽天監失於推算下掌監事

侍郎湯序等於詔獄 詳欽天監

五年九月朔日食 十一月朔日食望月食

七年五月己丑朔日食

成化三年二月丁酉朔日食

四年二月壬寅朔日食 十二月丁亥朔日食

五年六月癸丑朔日食 六年六月戊申朔日食

九年四月辛酉朔日食 十年九月癸丑朔日食

十一年九月丁未朔日食 十二年二月乙亥朔日食

十八年五月己巳朔日食 二十年九月乙酉朔日食

二十一年八月己卯朔日食

二十二年二月丁酉朔日食

弘治元年六月癸巳朔日食掌欽天監事太常少卿童軒
奏日食紀元之初當盛夏火旺之候宜修德以為取人

之本窮理以為燭奸之要進君子退小人以謹天戒

二年十二月甲申朔日食 七年三月己卯朔日食

八年三月乙酉朔日食 八月 朔日食

十三年五月甲寅朔日食 十四年九月丙子朔日食

十五年五月庚午朔日食 九月庚子朔日食

正德元年三月乙亥朔日食

二年正月乙亥朔日食既免朝賀

九年八月辛卯朔日食 十年十二月癸丑朔日食

十二年六月己巳朔日食 十三年五月己亥朔日食

十五年三月癸丑朔日食

嘉靖四年十二月乙卯朔日食

五年五月癸未朔日食 六年五月丁丑朔日食

七年五月辛未朔日食 八年十月癸亥朔日食

十八年八月朔日食

十九年三月癸巳朔日食禮部以例候不食聞 上悅

二十一年七月巳酉朔日食既 上下勅曰天心下眷累

及太陽正臣子欺君父外陰侵內陽之咎也夏言以臣
凌君罪不下郭勛第累年供事內苑故特宥死去之用
承天戒仍修省三日祇告玄極殿大小臣工宜既乃心

共圖濟理

二十二年正月丙午朔日食

二十七年三月丙子朔日食望月食

二十八年三月辛未朔日食

三十二年正月戊寅朔日食先是歲前秋月山東徐淮及
廣東俱大水冬日下有赤氣及四方地震疊見章奏至
是元日日食不盡者二杪南京御史徐棡上言日者衆
陽之長以清明普照爲德元日者三陽之首以生育長
養爲事乃於此時謫見於天數十年來未有天變若是
異者夫日食爲占先儒謂爲小人陵君子夷狄侵中國
之象以實應之則進君子退小人莫要於大察乞勅部

院秉公去留以明黜陟之典而京堂大臣依故事自列毋妨賢路疏上不報久之謫棧補外任

時日食陰雲不見頃之大雪百官以護日故罷朝賀次日始朝服詣奉天門行禮仍上表稱賀

御史趙錦言春秋日食三十有六未有無其應者至於食在正旦古人所謂變見三朝其應尤重臣謹以天意驗之人事醜虜驕橫閣臣怙寵有若影響之不易者敢昧死爲陛下陳之願陛下觀上天垂象之顯察二祖立法之微念操柄之不可使移思紀綱之不可使亂將嵩罷免以應天變勿使復侵府部諸司之柄則朝廷

清明紀綱自正醜虜雖橫臣知其不足平也上方以

供奉青詞悅嵩命速錦下錦衣獄久之削籍爲民

三十四年十一月朔日食

四十年二月辛卯朔日食是日微陰欽天官言日食不見

卽同不食上悅以爲天眷羣臣表賀而禮部尚書吳

山以救護禮畢報忤旨山引罪上曰爾等守禮不必

引罪該科官如何不叅令以狀對給事中李東華等惶

恐言聖德當陽祥雲護日當食不食此至敬格天之致

山等不知請恭謝玄恩乃如常救護罪不可逭臣等失

於叅正罪亦難辭上曰天眷人君若君之於臣有不

知感國典有不容况聖人事天敢不欽戴章內不口稱
賀曰謝玄姦巧孰甚為山前執白鹿殊祥殿廟強告原
父天眷玄嗣所致昨陰雲中監觀候甚明非測言比知
如常救護謂寧盡以誠不可失正是則是矣然不敬天
意賣直沽名亦不可也科首住俸餘各奪俸半年已大
學士嚴嵩言日食雲陰卽同不食不當救護人所共知
而是日行禮如故乃部臣之罪不當專責言官 上曰
卿此言敬天慎禮正法之謂本在尊官東華改罰兩年
餘宥之部臣姑記罪給事中梁夢龍等遂承風指劾山
上令閒住

七月己丑朔日食時日食一分五秒例免救護禮部尚書
袁煒上言 皇上以父事天以兄事日羣陰退伏萬象
輝華是以日位旺榮氛祲銷鑠食止一分與不食同臣
等不勝懽忭 上以為然而悅之

隆慶三年正月乙巳朔日食望月食先是給事中陳吾德
疏歲首日月交食天之大變而百官護日多慢不如禮
宜令禮官先於月食前一日戒飭之 皇上亦宜罷遊
樂屏玩好以答天戒則大小臣工將明知聖意所嚮罔
不寅恭兢惕以修政矣 上是其言

六年六月乙卯朔日食

